

## Band IX., Nr. 4068, Seite 418-419

*Pfalzgraf Eberhard von Tübingen eignet dem Kloster Denkendorf alle Güter und Rechte, die es von Tübingschen Lehensleuten erworben hat.*

Tübingen, 1291. Januar 21.

Wir Eberhart phaltzgrave von Túwingen verjehen und tun kunt allen den, die dizen brief lesent sehent oder horent lesen, daz wir mit verdahten müt und mit gútem rat unser friunde und sunderlichen mit rate unsers lieben ohains graven Albrehtes von Hohenberg haben geben durch got und durch ere des hailigen grabes und durch unser sele und aller unser vordern sele willen den ersamen und den gaistlichen mannen . . dem probste dem convente und dem goteshus ze Denkendorf, daz in Kostenser bistum gelegen ist, dize gabe und haben in gnade getan also, daz wir in und dem selben goteshuse alliu diu gút und alliu diu reht, swie diu sien genennet oder gehaizzen, diu si hant köffet gelöset oder swie sis gewnnen habent oder diu in oder irem goteshus geben sint und diu von uns und von unser herschaft lehen sint, haben bestetet und gefestent und zu aigen gemacht redelich und reht und haben in und dem selben goteshuse aigenlich und frilich ufgeben die aigenschaft und alliu diu reht, diu wir an den selben gúten und an den rehten heten oder mohten haben, also daz si und daz vor gnant goteshus diu selben gút und alliu reht sulen frilichen haben und niezzen und besitzen aigenlich und ewiglich iemmer mere mit allem rehte. Und daz diziu vor gnante gabe und gnade steite belibe unzerbrochen, so geben wir der vor gnant grave Eberhart dizen brief besigelt und gefestent dem vor geschriben . . probst dem convente und dem gotzhus mit des vor gnanten graven Albrehtes insigel und mit unserm insigel, diu bediu dran hangent, zu ainem urkunde der warheit. Dez sint geziuge: der vor gnant grave Albreht, der gaistlich herre . . der abte von Bebenhusen, Friderich von Ulme, Albreht der Hailant burger ze Tuwingen und ander vil ersame gút lúte. Wir grave Albreht von Hohenberg der vor gnant verjehen, daz wir geziug sien dizer vor geschriben dinge, und durch bet graven Eberhartes und . . des probstes und dez conventes so haben wir unser insigel gehenket an dizen brief zu graven Eberhartes insigel.<br> <br> Diz geschach, do waren von gotes geburt zwelf hundert jare niunzig jare und da nach in dem ersten jare, in der stat ze Tuwingen, an sant Agnesen tage.

—

Der Textabdruck folgt dem Original (italienisches Perg.).<br> <br> Die abhangend befestigt gewesenen Siegel fehlen.

## Überlieferung und Publikationen

**Lagerort:**

HStA Stuttgart

**Signatur/Titel des Originals:**

A 480 U 39

**Editionen:**

Schmid: Pfalzgrafen von Tübingen, Urkundenbuch, S. 70, Nr. 69 (Auszug).

## Weitere Angaben

**Beschreibstoff:**

Pergament

**Sprache:**

Deutsch

**Ausstellungsort:**

Tübingen

**Ortsindex:**

Denkendorf Wohnplatz (319)<br> Denkendorf, ES<br> Hohenberg  
Wüstung (26307)<br> Hohenberg, Schömberg, BL, W<br> Konstanz  
Wohnplatz (14442)<br> Konstanz, KN<br> Tübingen Wohnplatz (16214)<br> Tübingen, TÜ<br> Ulm UL<br> Ulm Gemeinde (16620)